

# Wok i go het long stretim Mekeo rot

**WOK i go het nau long stretim wanpela banis sait long bris long Ama'ama long Mekeo eria we bikpela tait wara i bin brukim.**

Cameron Constructions i go pas long dispela wok we dispela bruk banis o kalvet i rausim hap graun bilong rot long Hiritano haiwe i go na i mekim wokabout bilong ol ka na ol manmeri hat.

Dispela i mekim hat tu long ol pipol bilong ples i kisim ol samting bilong ol i go i kam long taun na ples na planti sot long kaikai na ol samting long lukautim ol yet long dispela taim.

Ol ka i save kam stop long hapsait na ol manmeri save karim ol samting bilong ol na wokabout antap long wanpela hap kokonas diwai go long hapsait we ol i save kalap long narapela ka na i go long ples o kam long taun.

Bekim bilong ol asples i no bikpela long dispela hevi

kamap long ol na dispela tasol wok long rot we dipatmen bilong woks i askim long en long taim i go pinis i stat long las wik Tunde tasol.

"Dispela i no save hariap na mipela i save lusim planti mani tu bilong wanem mipela i mas karim ol buai na bek kaikai bilong mipela na wokabout antap long wanpela kokonas diwai go long hapsait o mipela i save kalap long bot," presiden bilong Mekeo-Kuni lokol levol gavman kaunsel, Patrick Paeke i tok.

Planti bilong ol lain long Inauabui husat wara i go insait long ples na ol gaden bilong ol i bihainim haiwe i go klostu long Bereina we ol i laik sanapim ol nupela haus bilong ol long hap.

Planti ol samting long Inauabui pas long graun malu malu na ol wara bilong ol tu i bagarap.

Mista Paeke i tok ol dispela 10,000 o moa pipol husat i

kisim bagarap i mas kisim moa helpim.

"Wanpela bikpela rot bilong ol long kisim moni em long salim buai tasol dispela i bagarap bilong wanem i no gat gutpela rot long kisim buai bilong ol i kam salim tasol ol i wok long painim wanem ol liklik kaikai stap long gaden we wara i no bagarapim tumas," Mista Paeke i tok.

Em i tok ol samting we i ken helpim ol em ol klinpela botol o kontena bilong putim wara, ol kaikai na marasin.

Mista Paeke i tok Inauabui gat olsem 2,000 manmeri tasol i gat moa ripot i kam long Apanaipi long Sentrol na Galp boda, Amiaka long Not Mekeo, Veifa'a, Bereina na Eboa olsem i gat wankain tait wara i kamap na bagarapim ples long hap tu.

Bikpela wara, Angabanga tu i kaikaim graun long rot i go insait moa nau na mekim rot i go liklik moa yet.

## OL HAPHAP NIUS

**FM Sentrol kisim sapot long helpim ol lain painim birua**

WANPELA apil bilong tok Motu radio stesen long Pot Mosbi, FM Sentrol long las wiken long helpim ol lain i bungim hevi long tait wara long Mekeo eria bilong Sentrol provins i pullim sapot bilong

wanpela kampani pinis.

Mondo Used Clothing husat ol i save salim ol seken hen klos i kam long Australia i putim han long helpim dispela apil bilong FM Sentrol long donetim ol klos na ol narapela samting i go long helpim ol lain i bungim hevi long Sentrol provins.

"Mipela i go daun long Mondo long Konedobu long wiken long toktok long ol nupela samting ol i kisim na putim long stua na taim papa bilong Mondo Clothing, Kay Mori i harim, em i givim helpim," PM Sentrol program dairekta, William Mairi i tok.